

Bo Momentu di Krísis

E senkmentu di e barku *Estonia* dia 28 di sèptèmber tabata trágiko. Di 1051 pèrsona abordo, 912 a fayesé. Durante e poko minüt ku a tuma pa e barku hundi, teror i pániko a prevalessé. Pasaheronan zonzia a basha for di nan kabínanan, inundando gangnan i trapinan. Un polis sueko abordo a konta ku el a mira hopi hende na suela, fo'i tino. Den e pániko, hende tabata kore trapa riba nan. Andrus, un pasahero di 19 aña, a bisa ku "Algún hende di edat atvansá tabata sinta yora. Mi a stap over di muchanan ku tabata yora i tene e rel." Un sobreviviente sueko a konta di un muhé di edat atvansá ku un pia kibrá roganda pa nan dun'é un salbabida. "Ningun hende a hasi kaso di dje. Esnan heridá no tabatin chéns pa skapa."

E korespondiente di *Time*, notando ku e testimonionan aki a ser duná prinsipalmente pa hòmbèrnan adulto den bon kondishon físiko, a trese e pregunta dilanti: unda e kabayeronan a keda? Na lugá di yuda damanan, ansianonan, i muchanan, e hòmbèrnan tabata buska manera pa skapa nan bida so.

Durante segundo guera mundial, e barku di guera merikano, *Dorchester*, alkansá pa torpedonan aleman un 'or di madrugá, i a kuminsá senk den e awanan friu atlantiko. Kontrario di e òrdu ku nan a haña, hopi sòldá tabata drumi sin salbabida. Tur e salbabidanan èkstra a ser distribuí; ma den e pániko i konfushon, algun tòg a keda sin haña. Abordo di e barku tabatin un saserdote katóliko, dos pastor evangeléliko, i un rabí hudiu. Kada un, ku salbabida bistí, tabata konsolá esnan heridá, trankilísá esnan troumatisá, yuda distribuí salbabida, i guia e hòmbèrnan na e botonan di salbabida. Nan mes a nenga tuma e poko espasio den e botonan.

Ultimo biaha ku e kuarteto aki a ser mirá, nan tabata para riba dèk di e barku kondená, **sin salbadia**, teniendo man di otro, hasiendo orashon, mientras e barku tabata hundi. Nan a duna nan salbadida na esnan ku no tabatin.

Dos barku, dos senkmentu, dos reakshon kontrario. Kiku a hasi e diferencia?

E periodista di *Time* a spekulá ku e barku *Estonia* a senk asina rápido ku no tabatin oportunitat pa aktonan di kompashon. Vosero di Organisashon Marítimo Internashonal a deklará, "No tin lei ku ta bisa, 'Hende muhé i muchanan promé. Esei ta algu for di e era di kabayeria.'" Ekskusanan bunita, ma sin fondo!

Tin un motibu mas básiko pa hende su komportashon durante un emergensia.

Nos por soña di aktonan heróiko ku nos ta hasi den un krísis. Ma heroísmo i konsiderashon pa hende den nesidat no ta algu bo ta haña outomatikamente durante un emergensia. E ta algu ku mester ser **desaroyá**.

Nos ta atmirá e deportista ku ta hasi un hungáda spektakular i ta soña di dia ku nos por lusi asina. Ma motibu ku el a bria na e momentu ei tabata pasobra el a tren, tren, tren pa añanan, di dia i anochi.

E hende ku mientras barku ta senk NO ta stap over di muchanan desesperá, ku ta yuda un machi bieu ku pia kibrá, ta e hende ku ta komport'é komo kabayero tur dia. Nos ta tren awe pa loke nos lo ta den e krísis mañan. Na e momentu ei, lo bo ta presis loke bo ta awor. Un krísis no ta **produsí** heroísmo; e solamente ta **reveá** e heroísmo ku t'ei kaba. Segun Beibel, "Esun ku ta fiel den e mas mínimo, esei tambe ta fiel den kosnan grandi..." (Lukas 16:10). Nos ke destaká ora tur hende ta wak. Ma esei lo no sosodé si nos no ta fiel den e kos chikitu.

E pregunta ta, ki sorto di pèrsona bo ta **awe**? Bo ta komportábo manera un kabayero? Bo ta demonstrá kompashon i konsiderashon pa esnan den nesidat? I ki sorto di pèrsona bo ta ora ningun hende ta wak? Bo ta hòrta short i hasi algu ku bo no ke pa otro hende sa? Loke bo ta pa kara di hende ta loke bo ta en realidat--òf ta djis un máskara ku bo ta skonde su tras?

Na momentu di krísis, lo bo ta presis loke bo ta den bida. No por ta otro. Kon lo bo komportábo na momentu di krísis? I kon lo bo ta pará na momentu di e krísis kulminante di bo bida: ora bo para dilanti Dios? Skritura ta bisa, "Ta poné pa hende muri..i despues ta sigui huisio" (Hebreonan 9:27). Bo ta prepará awe pa e krísis mañan?